

Meeqqap naartuunerani peqqissuunissaa anguniarlugu, angajoqqaanngortussallu hashimik imigassamilluunniit naartunerminni milutsitsinerminnilu ajornartorsiuteqartut, siusinaartumik katsorsarneqarsinnaanerannut periarfissikkumallugit Naalakkersuisutigut iliuusissanik ersarissaasoqarnissaanik kiisalu katsorsarneqareernerisa kingorna malinnaavigineqarnissaat paasissutissanik katersisoqarnissaa siunertaralugu Naalakkersuisut suliniuteqaqquneqaqqullugit Inatsisartuni aalajangiiffigisassatut siunnersuut.

(Inatsisartunut ilaasortat Aleqa Hammond aamma Ruth Heilmann, Siumut)

Akissuteqaat

(Peqqissutsimut Naalakkersuisoq, Agathe Fontain)

Siullermeerneqarnera

Meeqqap naartuunerani naalungiarsuuneranilu peqqissuunissaa anguniarlugu angajoqqaanngortussat hashimik imigassamilluunniit naartunerminni milutsitsinerminnilu ajornartorsiuteqartut katsorsarneqarsinnaanerannut periarfissikkumallugit iliuusissanik ersarissaasoqarnissaanik kiisalu katsorsarneqareernerisa kingorna malinnaavigineqarnissaat eqqarsaatigalugu paasissutissanik katersisoqarnissaa siunertaralugu Inatsisartunut ilaasortat Aleqa Hammondip Ruth Heilmannillu siunnersuuteqarnerat Naalakkersuisut qujassutigaat.

Innuttaasut peqqissuunissaat pillugu maanna suliniutigineqartumi, Inuunerittami, meeqqat inuusuttullu pillugit suliniuteqarnermi periusissiat sisamat ingerlanneqarput, taakkua ilagaat *"naartusut taakkualu ilaquataat, inunngorlaat meeqqallu immikkut ittumik ulorianartorsiortut aamma/imaluunniit immikkut ittumik pisariaqartitsisut pisariaqartitaat ulorianartorsiortineqarpata imaluunniit sumiginnarneqarpata piaartumik iliuuseqarnissaq malitseqartitsinisarluk".*

Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik suleqatigalugu periusissiaq tamanna suliniutinik makkuninnga malitseqartinneqarpoq *"Ilaqutariinnut meerartaartussanut piaartumik iliuuseqarnek"*, *"Meeqqamut Piareernek"* aamma *"Inuusaq atorlugu suliniut"*. Taamaammat Akileraartarnek Atugarissaarnerlu pillugit Isumalioqatigiissitap aamma Meeqqanut Inuusuttunullu Periusissiap siusissukkut suliniuteqarnek tamatigit nukittorsarniarpaat, tassa meeqqamut suli inunngunngitsumut taassumalu ilaquataanut tunngatillugu peqqissuseq, ilinniartitaaneq isumaginnittoqarfillu pillugit suliniutit tamarmiusut imminnut ataqaatigiissinniarlugit ataqaatigiissaarniarlugillu.

“Ilaqutariinnut meerartaartussanut piaartumik iliuuseqarnek” iluatsilluarsimavoq. Suliniutip ingerlanneqarnerata qiteqqunnerani naliliinerup takutippaa ilaqutariit tamarmiusut 16 %-ii

suliniuummut innersuunneqarsimasut. Suliniutip ingerlanneqarnerani paasinarsipallappoq ilaqutariit meerartaartussat amerlaqisut atornerluinermik annertuumik ajornartorsiuteqartut. Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik suleqatigalugu naartunerminni atornerluisuusut katsorsarneqarnissaannut aningaasaliissuteqartoqarpoq. Neqeroorut taanna 2011-mi inoqutigiinnut tamarmiusunut aamma atuutsinneqalerpoq, taamaalillutik 27-t katsorsarneqarput tallimallu ilaqutariinnik sullissinnermut ilaatinneqarlutik. Katsorsarneqartunit pingasut marloriarlutik katsorsartipput. Pitsaanerpaamik angusaqarnissaq qulakkeerniarlugu atornerluinermik katsorsartittut katsorsarternerminni ikorfartoqatigiissinneqartarput, tamatumani kommunit suleqatigineqarput, taamaalillunilu ilaqutariit ilaqutariinnik sullissivinni tapersorsorneqartarnissaat qulakkeerneqarluni.

Pitsaaliuinermillu suliaqarneq aamma pingaaruteqarpoq. “Meeqqamut Piareerneq” pillugu pikkorissaanermi siunertarineqarpoq angajoqqaanngortussat tamarmik angajoqqaatut suliasaminnik isumaginninnissamut pitsaanerpaamik tunngavissaqarnissaat. Pikkorissaanikkut angajoqqaanngortussat meeraaqap ineriartortarnera ilisimasaqarfingilissavaat, piviusunik misilittagaqalissapput, meeqqap perorsarneqarneranut tunngatillugu ileqquusunik allanngortitseqataassapput kiisalu angajoqqaajusut akornanni inuttut attaveqatigiinnermik nukittorsaaqataassapput. Aammattaaq ilinniartitsinnermut ilaatinneqarput erninissamut piareersartarnerit pillugit sammisassat, soorlu naartugineqartup ineriartornera, naartunermi inuttut pissusiler-suutit, ernineq milutsitsinerlu.

Ilaqutariippassuit meerartaartussaallutik atornerluisuusut sulinnermut, ilinniagaqarnermut siusissukkullu sumiginnagaasimanermit kingunerlutsitsinnermut tunngatillugit annertuumik ajornartorsiuteqartarput. Taamaammat atornerluinermik katsorsaaneq suliniutik allanik aamma malitseqartinneqartassaaq. Meeqqanut Inuusuttunullu Periusissiami naartusunut aamma ilaqutariinngorlaanut tunngatillugu suliniutissatut nassuiaatit sorliit aallartinneqasanserut kommunit, Peqqissutsimut Naalakkersuisoqarfiup, Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfiup aamma Ilinniartitaanermut Iisimatusarnermullu Naalakkersuisoqarfiup akornanni maannakkorpiaq isumaqatiginninniutigineqarput. Aammattaaq pingaaruteqarpoq erseqqissaatigissallugu, ilaqutariit taakku ajornartorsiuteqarmata ilinniartitaanikkut immikkut ittumik piginnaasaqarfisariaqartunik. Suliassaqarfik tamanna Paarisa aamma Meeqqanut Inuusuttunullu Periusissiaq aqutigalugit maannakkorpiaq kivinniarneqarpoq.

Atornerluinermik katsorsaasarneq pillugu isumaqatigiissut maanna atuuttoq paasissutissanik katersisoqarnissaanut pitsaalluinnartumik periarfissaqartitsivoq. Tassa katsorsaanerup sunniutaanik takutitsillunilu uppersarsaaginnaranani aamma atornerluinermik katsorsartinnissamut neqeroorutitta nalilersorneqartarnissaannut pitsaasuujartinneqarnissaannullu ikiuutaasinnaasunik allarpassuarnik paasissutissanik pissarsisitsisarami.

Suliaqarfimmi maanna ingerlanneqartunut siunnersuut naapertuummat inassutigineqarpoq akuersissutigineqassasoq.